

Lindås kommune
Kvernhusmyrane 20
5914 Isdalstø

Innspel til planprogram for kommuneplanen sin arealdel

Naturvernforbundet Nordhordland har gått gjennom planprogrammet og ønskjer å koma med følgjande innspel:

Generelt

Fortetting er eit viktig tema i programmet. I eit klimaperspektiv meiner vi det er fornuftig å tenka slik, særleg i Knarvikområdet. Perspektivet må likevel ikkje stå i vegen for eit berekraftig desentralisert busetnadsmønster bygd rundt lokalsenter med naudsynste servicetilbod. Sterk sentralisering til Knarvik på kostnad av andre lokalsamfunn i Nordhordland meiner vi ikkje er fornuftig korkje i eit klima-, ressurs- eller velferdsperspektiv.

Det skal greiast ut om området Austfjorden - grense Modalen skal ha særskild status for friluftsliv. Naturvernforbundet Nordhordland støttar ei slik utgreiing. Her vil vi leggja til at vi gjennom årsmøtevedtak har gjort framlegg om området rundt Eiterdalen som landskapsvernområde. Vi vil be Lindås kommune arbeida vidare med dette innspelet i utgreiinga.

Behovet for naust skal først og fremst bli dekkja av småbåthamnene. Det blir opna for nokre nye større naustområder (8-15 stk.) med krav om tilgang for bil, parkering og offentlegheita. Dersom flytebrygge og kai, skal det vera felles anlegg for området. Naturvernforbundet Nordhordland er samd i perspektivet om konsentrasjon, men meiner 8-15 nye større naustområde representerer eit alt for stort inngrep i strandsona i Lindås. Frittstående naust må Lindås kommune vera svært restriktiv til.

Trygg ferdsel og kollektiv-, gang og sykkeltiltak er framheva i planprogrammet. For å få ned klimagassutsleppa er dette viktige plangrep, ikkje minst i høve Knarvik/Alversund-området, men òg i høve til bustadbygging og fortetting på Ostereidet og Lindås.

Vi saknar akvakultur som tema i planprogrammet. Lakselus, sjukdom, lokal forureining, rømmingar og store arealbeslag i konflikt med landskap, friluftsliv og yrkesfiske gjer at Naturvernforbundet Nordhordland ønskjer reduksjon i areala til oppdrett. Vi bed difor om at temaet vert teke inn i planprogrammet.

Lonena i Knarvik

Lonena er Knarvik si grønne lunge der menneske frå alle generasjonar og samfunnslag møtes til tur- og friluftsliv. For Knarvik som regionsenter er Lonena eit pustehol. Spesielt vil vi framheva verdien av lek i naturen for både barn og voksne.

Lonena er ei viktig årsak til trivsel i Knarvik og eit eineståande eksempel på eit område i nærleik til der folk bur som både kan by på fred og ro, turgåing og ikkje minst aktivitet for borna i naturen utan asfalt, leikeapparat og kunstig tilrettelegging. Området er lett tilgjengeleg og blir svært mykje brukt både av skular, barnehagar og institusjonar på dagtid og idrettslag, trimmarar og friluftssøkande i alle generasjonar i fritida. Vi vil også trekkja fram verdien av våtmarksområdet i Lonena. Det verker som ein buffer på regnvatn og vil mista mykje av verdien dersom det blir laga kunstig avløp slik at «svamp»-eigenskapen går tapt, vatnet mister si naturlege veksling og biotopen dermed blir skadelidande.

Naturvernforbundet i Nordhordland ser at Knarvik har mange område som eignar seg til boligbygging og bør ha råd til å spare dette unike natur- og friluftsområdet til fordel for ALLE innbyggjarane i Knarvik.

I planprogrammet for Lonena er det 3 alternativ for utbygging: Alt. 1 : 0 einingar (dvs. at området er som no).
Alt. 2: 800 einingar. Alt. 3: 1500 einingar.

Naturvernforbundet i Nordhordland meiner at sjølv den minste utbygginga (alt. 2) vil verka sterkt negativt på området. 800 einingar ser vi på som eit alt for stort inngrep i eit så sårbart friluftsområde, som Fylkesmannen i Hordaland og Hordaland fylkeskommune meiner har «stor regional verdi».

Av kommunen sine 3 alternativ går Naturvernforbundet Nordhordland dermed inn for 0-alternativet som einaste moglegheit for at Lonena-verdiene skal bli ivaretatt.

Som konsekvens meiner vi at Lonena i kommuneplanen må få LNF-status.

Jan Nordø
leiar
Naturvernforbundet Nordhordland

Ketil Hindenes
styremedlem
Naturvernforbundet Nordhordland